

四庫全書

子部

欽定四庫全書

六藝之一錄續編卷三

錢唐倪濤撰

石刻題跋

朱彛尊竹垞甫曝書亭集

梁始興安成二王墓碑跋

康熙辛酉江南試士既畢為攝山之游出郭道經黃城
村梁侍中司徒驃騎將軍始興忠武王愔墓在馬王太
祖第十一子都督荆湘等六州軍事有惠政州民歌之

所云始興王民之爹是已薨於普通三年碑辭侍中徐
勳撰貝義淵書又東北甘家巷梁贈侍中司空安成康
王秀墓在焉王太祖第七子以中衛將軍領宗正卿尋
都督郢司霍三州軍事遷雍梁等四州軍事亦多惠政
天監十七年薨於竟陵歸喪京師故吏譙郡夏侯亶表
請立碑詔許之於是名士游王門者東海王僧孺吳郡
陸倕彭城劉孝綽河東裴子野各製其文今存碑二其
一余泐惟孝綽一碑結銜石上可辨書之者亦貝義淵

也二王同母俱以孝悌聞於時又皆好文安成招劉孝
標撰類苑始興降意接士嘗與賓客連榻而坐史臣合
傳比於漢之河間東平其葬也兆基匪遠雖宰木已盡
而麟辟邪鬣負猶存第穹碑將仆勢不能支椎拓之工
莫敢措手觀者亦憚於久立也昔歐陽子著集古錄於
蕭梁止收智藏法師一碑而此三碑在建康都會之區
汴京承平日度石尚堅立顧反遺之何與義淵爵里未
詳廣韻注貝氏不載姓源鄭樵姓氏畧于貝氏則引宋

登科記有常州貝寶明永嘉方日升補注黃公紹韻會
引千家姓韻譜云貝氏望清河古有貝獨坐晉有術士
貝靈該不及義淵羅泌國名記謂貝氏吳越多此姓本
諸左傳耶氏按春秋傳昭公十九年楚子之在蔡也耶
陽封人之女奔之生太子建杜預注耶陽蔡邑二十三
年傳稱楚太子之母在耶召吳人而啟之冬十月吳太
子諸樊入耶杜預注曰耶耶陽也定公十三年傳稱齊
侯衛侯次於垂葭實耶氏杜預注垂葭改名耶氏高平

鉅野縣西南有耶亭然說文玉篇類篇俱無耶字第有
鄭字今南北國子監本悉更鄭為耶不與孰甚焉惟唐
長安所鐫石經仍作鄭字足以正其誤矣予念六代刊
石之文南朝更為難得爰取孝綽文并手模始興碑殘
字書之冊而識其末

茅山許長史舊館碑跋

陶隱居書許長史謚舊館碑拓本觀於爛溪潘氏隱居
以工草隸聞見於史傳嘗與梁武帝論書連章累牘載

諸法書要錄袁昂書評謂如吳興小兒形容雖未成長而骨體甚駿快竇泉賦則云高爽緊密自然擺闔今翫是碑筆與手會信昔賢之言不誣碑立於梁普通三年至唐大曆十三年中山劉明素以文字將湮重加洗刻使原碑而在駿快高爽當更倍此矣

魏魯郡太守張猛龍碑跋

右魏魯郡太守張猛龍碑建自正光三年其得列孔林者以當日有興起學校之功也吾於是乎有感孔子之

道若日月然萬物宜無不向照乃或叛而之佛老何與
蓋誅賞者治世之權聖人者是非所從出也春秋之作
所以誅亂臣賊子者至矣天下之人非者嘗多是者嘗
少懼無逃於聖人之誅獨佛老以無所可否之言暢其
清淨寂滅之旨為恒情所樂聞而聖人者亂世之所惡
也元魏之俗事佛尤甚斬山以為窟範金以為像九層
之臺萬金之液竭民力事之及其既成靡不刊石勒銘
以紀功德斯時也又安知有聖人之道哉猛龍為西平

武公軌八世孫方晉之朝士崇尚莊老獨武公在涼州徵胄子五百人立學校春秋行鄉射禮而猛龍克循祖父之教修聖人之學於舉世不為之時使講習之音再聞於闕里噫可傳也予留大同問拓拔氏故都觀所鑿佛宮穹碑巨碣已無存者而斯碑在孔氏之庭歷千年不壞雖更歷千年知莫有徙而去之者此予所為感也嗚呼為政之君子可以知所務矣

魏李仲璇修孔子廟碑跋

右曲阜縣修孔子廟碑魏兗州刺史李仲璇撰文并書
孝靜帝興和二年十二月立石杏壇之下碑尚完好雜
大小篆分隸於正書中蓋自太武始光間初造新字千
餘頒之遠邇以為楷式一時風尚乖別此江著作式所
云世易風移文字改變俗學鄙習炫惑於時者也曩觀
太原風峪高齊時鐫石柱佛經亦多類是斯亦穿鑿失
倫矣仲璇魏書有傳自兗州還除將作大匠卒贈驃騎
大將軍儀同三司青州刺史

北齊少林寺碑跋

右碑北齊後主武平元年正月立於嵩山少林寺文本
正書雜用大小篆八分法北朝碑多類此書家嫌其乖
劣然以拙筆見古與後代專逞姿媚者不同也碑後列
勸化主邑師邑子都維那忠正北面像主僧主多人中
有張黃頭馬黃頭按北史游雅小字黃頭則黃頭命名
亦當時習俗然爾叢主揆之以義當屬齋字但說文玉
篇汗簡等書皆無之吾不敢知也曹上舍仲經好古金

石文特裝界為冊跋其尾焉

宇文周華嶽碑跋

後周華嶽頌立於武帝天和二年在今華陰縣西金天王廟中碑於題後結銜曰使持節驃騎大將軍大都督開府儀同三司司宗治內史臨淄縣開國公万紐于瑾造此文車騎大將軍儀同三司縣伯大夫趙興郡守白石縣開國男南陽趙文淵字德本奉勅書万紐于瑾者唐瑾也為燕公于謹器重白文帝言瑾學行兼修願與

之同姓結為兄弟文帝乃賜姓万紐于氏庭羅子孫行
弟姪之敬時瑾已位開府矣進爵臨淄縣伯周制封郡
縣五等爵者皆加開國授大將軍開府儀同者並加使
持節大都督其曰司宗者武帝保定四年更禮部稱司
宗也複姓古有之三字姓始於代北魏書官氏志載有
勿狃于氏紐作忸勿疑万字之譌賜此姓者洛陽則于
謹猗氏則樊深匪持唐瑾也文淵於大統十年追論立
義功封白石縣男邑二百戶遷縣伯下大夫加儀同三

司天和元年露寢成以題榜功增邑二百戶北史更淵
曰深避唐高祖諱也史稱其楷隸雅有鍾王之則今觀
是碑殆非虛譽云

後周幽州刺史贈少保豆盧思碑跋

右周少保豆盧思碑康熙歲戊子觀于稼堂潘氏書屋
思本前燕支庶姓慕容氏與兄同州刺史封楚國公贈
太保寧先後立功碑云思字永恩北史後周書俱闕其
名止書其字永恩附見寧傳惜也後幅漫漶不能卒讀

金史卷之三十三
卷三
矣宇文建國用蘇綽盧辯輩議禮謚法不輕假人即宗
子維藩弗隱惡德如晉公護曰蕩齊王憲曰煬衛王直
畢王賢曰刺趙王招曰僭陳王純曰惑越王盛曰野代
王達曰興紀王康曰厲而豆盧兄弟或易名以昭或易
名以敬誠厚幸矣稼堂曰昭乎哉子之言也曷書之於
是乎書

真定府龍藏寺隋碑跋

真定府治東龍興寺隋龍藏寺故址也寺初於開皇六

年恒州刺史鄂國公金城王孝僊立石齊開府長兼行
叅軍九門張公禮撰文恒州齊亡後入於周周又亡入
於隋而公禮仍書齊官君子不忘其故國於稱名見之
矣流傳宋太祖曾幸其地寺重建於乾德元年龍興之
額所由更也然歐陽子著集古錄稱龍藏寺已廢遺碑
在常山府署之門則嘉祐間碑猶在寺外也今入門有
殿殿北閣五層廣九楹崇十有三丈中奉觀世音像高
七丈三尺臂四十有二土人目爲大佛寺碑亦具存而

終南山釋道宣撰神州寺塔錄鋪叙佛像顧不及焉何哉若夫隋之碑存於今者寡矣裝界而藏諸也可

題偽刻李衛公告西嶽文

按文內石抹宜孫應改舒穆
皆伊遜回題識故仍其舊

王侯將相時至則居之雖豪傑之士不能預信於平日也劉季起沛上衆推擇可為沛令者蕭曹等皆文吏自愛恐事不就盡讓季當其時安能必後之相季封酈平陽哉劉伯溫羈管紹興感憤至欲自殺又嘗為石抹宜孫所用初未有佐命之思而或謂其在西湖望見雲物

曰後十年有帝者出吾當佐之殆妄也世傳李衛公未
遇為文告西嶽神意在取天下次則擇主而事若微時
預以帝王自許者然考之史衛公初仕隋為殿內直長
尋為馬邑丞唐高祖擊突厥衛公察其有非常志乃自
鎖上急變新舊唐書所載略同可謂不知天命之尤者
亦安得於未遇時逆知為唐佐命出入將相乎其事雖
見李肇國史補而告文不知何人所作其云斬大王之
頭焚其廟宇此豈衛公之言昧者從而刻之石按歐陽

趙氏所錄皆無之蓋近代作偽者為之真妄男子也

唐太宗晉祠碑銘跋

唐太宗自晉祠興師定天下貞觀二十一年七月御製
碑文及銘勒石於叔虞祠東隅碑陰列長孫无忌蕭瑀
李勣張亮李道宗楊師道馬周銜名後人覆之以亭而
庸工以字畫上石稍淺遂刻而深之帝嘗自述作書之
法惟求骨力骨力既得形勢自生不意為庸工改鑿而
骨力形勢俱失矣予嘗五至祠下輒摩挲是碑覽古興

懷集少陵野老詩句文章千古事社稷一戎衣書於庭
柱富平李因篤子德見而賞其工因遺書與予定交於
其歸也拓銘一本贈之而書其後

唐騎都尉李君碑跋

同里曹生仲經嗜金石文手拓同州李君碑示予紙墨
精善對之眼明碑未詳書者姓氏觀其峻利秀逸非王
知敬殷仲容不能造詣及此李君諱文字緯東漢以後
字必以兩字稱一字者罕矣載於唐書房元齡字喬顏

師古字籀李衆字師李琇字琇張巡字巡郭曜字曜字
文審字審李恢字祚李條字堅竇思仁字恕張義方字
儀此外不多見也

唐郭君碑跋

右郭君碑在汾陽縣北七十里予於丙午秋經郭社村
行溝中仰見土岡之上碑額微露環岡數里乃登讀其
文皆駢儷語首二行剝裂君之名字門世與撰文者皆
闕焉其知為郭君者藉有額存也碑立於乾封二年中

有云揮霜刃而斬老生蓋從太宗攻霍邑者按舊唐書
宋老生棄馬投塹甲士斬之新唐書則稱為劉弘基所
殺溫大雅創業起居注又云老生攀繩上城軍頭盧君
諤所部人跳躍及而斬之世咸不知揮刃者之為郭君
而君之名以石裂終不傳可惜也

跋唐明徵君碑

上元縣攝山佛寺明徵君碑其文唐高宗御製書之者
高正臣也碑立於上元二年徵君者蕭梁處士山賓寺

其故宅高宗以山賓來孫崇儼入閣供奉特為撰文勒之於石石至今猶完好歲在辛酉十月予與金陵鄭蓋常熟王翬嘉興周質平湖曹彥樞暨予弟彛价同游是山留信宿各搦一通以歸

唐龍門奉先寺盧舍那像龕記跋

水經伊水出南陽縣西東北過陸渾縣南又東北過伊闕酈道元注昔大禹疏以通水兩山相對望之若闕春秋之闕塞是也韋應物詩鑿山斷伊流中斷若天闕而

司馬君實之言曰龍門伊闕天所為非山橫其前水壅
其流禹始鑿之然後通也斯言其信矣夫山有八寺其
一曰奉先像建自咸淳三年而以調露二年賜額蓋闕
去洛陽二十五里而近兩岸銅龕佛像累千合夾侍坐
立者幾盈萬此杜少陵詩所云氣色皇居近金銀佛寺
開也碑闕書者姓名或云袁元哲竝考正續書之康熙
戊子竹垞八十翁彝尊識

跋石淙碑

右唐武后夏日游石淙詩并序羣臣和者一十六人河東薛曜正書久視元年五月刊於平樂澗之北崖斯游也新舊唐書本紀均未之書計敏夫唐詩紀事亦不載僅見之趙明誠金石錄及樓大防集而已予友葉封并叔知登封縣事撰嵩陽石刻記始著於錄顧刪去九首覽者不無憾其闕漏康熙己卯九日獲披全文碑尚完好漫漶僅三字惟張易之昌宗姓名為人擊去然猶可辨識也并叔曩語予澗壁面水必穴崖棧木乃可摹拓

故儲藏家罕有之予性嗜金石文以其可證國史之謬而昔賢題咏往往出於載紀之外若賈餗華岳詩李夔恒岳詩任要韋洪岱岳觀白蝙蝠詩三衢石橋寺李諲古風臨朐馮氏詩紀海鹽胡氏唐音統籤泰興季氏全唐詩集皆略而不收斯碑亦棄不錄世遂莫知睿宗及狄梁公之有詩傳於今予因為跋其尾

跋唐博城令祭岳詩

右唐博城馬令詩在岱岳觀碑之東側面其名剝蝕題

曰勅使麻先生者按今觀中有雙碑其西一碑北面第二層有久視二年記文稱神都青元觀主麻慈力親承聖旨齋龍壁御詞繒帛香等物詣此齋醮即其人也神都即東都故詩中有伊水嵩巖之句履蓋金輪十三字之一音義未詳亡友顧炎武寧人吳任臣志伊均疑爲應字想當然矣

唐張長史郎官石記跋

張長史以草聖名正書傳者絕少而墨數九品書人列

之上上良以其正書不易得也郎官石記舊本存王太
傅濟之家後王元美敬美迭相藏弄三公各有題識董
尚書思白摹而勒之戲鴻堂帖謂海內止有一本蓋以
絕品目之矣相傳是冊乃唐人所拓疑未必然龔明之
中吳紀聞云唐郎官題名碑承平時在學舍中堂之後
兵火後不復存長史蘇人故立碑於此按郎官題名宜
在長安其刻石存蘇州學舍者吳人鄉曲之情耳此必
淳熙以前所搨無疑康熙乙酉六月觀於商丘宋公節

使之解

開元太山銘跋

莊周稱易姓而王封太山者七十二家勒石千八百餘處歷千萬禩而石臧玉牒後人莫得見其形兆果神明為之守護耶祖龍肇始立碑久已埽迹兩漢迄唐間世一修時邁之典開元天子允文武百寮之請於十三年冬十一月式遵故實有事於太山詔中書令張說右散騎常侍徐堅太常少卿韋縉秘書少監康子元國子博

士侯行果於集賢書院撰儀注己丑日南至法駕詣山下御馬以登行升中之禮天子製紀太山銘親扎勒於山頂之石以十四年九月庚戌告成於是中書令張說撰封祀壇頌侍中源乾曜撰社首壇頌禮部尚書蘇頲撰朝覲壇頌趙明誠金石錄目載泰山銘側有題名三列今已亡之而頲頌授梁昇卿書刊御製銘右明有俗吏以忠孝廉節四大字鏡其上頌文毀去者半可憾也碑銘典雅或是燕許手筆而御書適勁若怒猊渴驥羈

東安閑不比孝經之多肉少骨若唐隸盡如此何慚漢
碑碣乎山高四千九百丈二尺行旅出於途者車前馬
首仰視略可覩歲在己酉五宿茲山之麓未克叩天關
陟環道手摸其文詢之野老必架木緣絙而上然後椎
拓可施又山高多風兼慮日曝紙幅易裂若是其難也
曩者先後裝界三本悉為好事者所奪己丑夏同里沈
秀才翼能分書獲此本於白下雖有闕文乃百年以前
舊榻爰審定而書其本末於冊尾銘書隋作隨書繹繹

作奕奕有曰自今而後倣乃在位將多於前功而必彼
後患豈意天寶之亂近在目前也乎是歲六月丁未舟
發江都阻風瓜州渡口書

唐封北嶽神碑跋

唐天寶七載封北嶽神為安天王是時祿山近在肘腋
安天王之名得毋為之兆乎碑辭李荃撰其陰則康傑
文書以八分者戴千齡也筆法淳古遠在韓擇木蔡有
隣梁昇卿張廷珪史惟則諸家之上乃盛熙明考書法

獨遺之何與

唐崇仁寺陀羅尼石幢記

西安府崇仁寺陀羅尼石幢唐天寶七載五月建張少
悌書所題職名有駕出長上扶車長上按唐制兵部尚
書選驍勇材藝可為統領者拔其尤令宿衛目曰諸色
長上有一日上兩日下者有五日上十日下者若長人
長上取形軀六尺六寸以上者充之則每日隨仗下隸
左右監門衛者也又有直長長上長孫溫充尚儀直長

李嗣福充監門直長李善充尚輦直長上周先孝充左
羽林軍長上見於新書宰相世系表外河渠畧有長上
漁師此云駕出扶車殆皆宿衛士矣少悌筆法娟秀稼
堂是本尤佳因撫六典新舊書識其末康熙四十有七
年二月壬寅朱彝尊題

書唐蘇秘監小洞庭碑跋

天寶十三載七月扶風蘇源明守東平時濟陽有河隄
之役太守李凌憂夫役不均於是濮陽守崔季重魯郡

守李藺濟南守田琦胥會於東平源明議廢濟陽以盧
東阿歸東平平陰長清歸濟南陽穀歸濮陽既而縣乃
不割郡亦仍舊見源明所作詩序而劉昫地理志稱天
寶十三載廢濟州將母國史傳聞或失其實與迨明年
祿山作逆則源明已徵入國子司業此杜甫八哀詩有
一麾出守還黃屋朔風卷之句也當五太守讌集源明
特字渦泊曰小洞庭亭曰洄源至太和中天平節度使
令狐楚以二詩立石題云自源明迄楚為時僅八十年洄

源亭渦泊已迷其處矣聞是碑尚存惜儲藏金石文字者多不著於錄也

唐憫忠寺寶塔頌跋

右憫忠寺寶塔其文張不矜撰蘇靈芝書建自唐至德二載碑稱御史大夫史思明奉為大唐光天大聖文武孝感皇帝敬无垢淨光寶塔頌宛平孫侍郎耳伯著春明夢餘錄謂碑建於思明初歸之時而崑山顧處士寧人撰金石文字記稱嘗偕郵人萬貞一觀是碑其文陷

處類磨治再刻以為思明復叛之後磨去及思明誅此地歸唐後人所重刻者今年冬遇貞一於諸城李渭清所遂同往觀馬碑首范陽郡三字史思明三字次行大唐等十二字文中維唐紹統及彼命啟與禪虞又東宅四水西都八川暨唐祚字至德二載字其文深陷然書法實出一人始悟侍郎處士所云猶未為定論也考思明之降在至德二載十二月至明年正月肅宗始加尊號二月乃赦天下改元碑既建於二載十一月不宜預

書尊號又思明初附肅宗授以歸義王范陽節度使若
碑建於降後宜大書王爵不當祇稱御史大夫則是碑
之建蓋在思明未降唐之先范陽郡三字其初本二字
祿山僭稱范陽為東都必東都也大唐一行其初必祿
山父子偽號文中唐字其初必燕字而至德二載其初
必祿山父子僭號之年無疑載攷安慶緒襲位賜思明
姓安名榮國迨既降附復更舊名因命靈芝改書者爾碑
文以左為前寧人謂是書丹於石之故疑從祿山俗未

可定也不矜與判官耿仁智同僚史思明之將復叛也
表請誅李光弼不矜實為起草辭曰陛下不為臣誅光
弼臣當自引兵就太原誅之及將入函為仁智削去思
明知之遂執二人仁智死不矜度難獨免可知已當日
思明降而復叛既誅之後唐人見其碑踣之惟恐不力
安有反勒其名於石者乎此又事之所必無也貞一聞
予言作而曰有是哉於是人摹一本予為考其始末書
於後

蘇靈芝易州鐵像頌跋

蘇靈芝書予所見者幽州憫忠寺寶塔頌及是碑而已
今其石漸泐飛動之致已失遂不堪與李北海對壘此
宋人榻本精采具存董尚書稱其道密宜矣冊舊藏曹
氏古林康熙壬午春忽見於花南水北之亭正如久別
故人相對古林金石表儲藏秦漢已來至五代十國凡
七百本近已散失斯碑獨為識者所得幸矣

唐御史臺精舍記并碑陰題名跋

唐自貞觀中李乾祐為御史大夫別置臺獄囚常訊就
近拘繫之其漸也侍御史東西推監察御史糾視刑獄
各禁其囚迨武后時來俊臣侯思止皆為御史制獄之
外臺獄圜扉恒滿崔隱甫總臺務言於朝掘去於是旁
列精舍以釋典懺之崔湜為文梁昇卿書以八分開元
十一年勒諸石碑陰列侍御史殿中侍御史監察御史
并內供奉銜題名僅盧懷慎崔湜陸景初三人亦昇卿
分書自懷慎以下正書百二十二人侍御史也自湜以

下正書百八十四人殿中侍御史也自景初以下正書
三百四十七人監察御史也碑額又有天寶元載以後
侍御史知雜侍御史監察御史共五十人而碑文左右
推拓不及焉中有薛儁儁者二名重文碑凡三見此唐
一代所僅有也昇卿自監察御史歷殿中侍御史遷侍
御史再遷太子右庶子

唐儲潭廟裴謂喜雨詩碑跋

贛州儲潭廟唐碑二載陳思寶刻叢編予屬友人訪求

謁廟下者輒云無有康熙壬申十有一月泊舟於潭獲諸儀門之右其陽裴諤詩其陰裴氏族中題名記事後十年吳江張吉士尚瑗出知興國縣事乃拓諤詩見貽惜其陰面壁工人不知響榻然胡氏統籤李氏全唐詩諤作皆無之叢編所載諸道石刻其中唐人詩尚多惜無好事若張君為予博訪而摹拓之也諤字士明洛陽人尚書寬子仕至兵部侍郎舊史有傳

平定州唐李諤妒神頌跋

異哉妒神之有頌也神之號不在祀典見於史傳者唐高宗將幸汾陽宮并州刺史李冲元以道出妒女祠俗云盛服過者必致風雷之災乃發萬人別開御道知頌使狄仁傑謂天子行風伯雨師清塵洒道何妒神之害邪遽令罷役然則妒女有祠其來久矣相傳神介之推妹也頌之者誰游擊將軍上柱國李謹也碑於何所今平定州娘子關也州東有井陘東北有盤石葦澤而斯關以娘子稱殆因神而名之也立碑之歲大厯十三年

也神之行事不見於春秋內外傳其妒也孰傳道之自唐以來祈焉而祝史陳廟焉而媵臘祭此謂有其舉之莫敢廢也且夫妒惡德也宜為衆所共惡而神乃以此致頌此不虞之譽也井陘西南太原東北妒神之水澹焉黛色興雲致雨侷造化力頌之辭也吾思古人嗜金石文字者多矣考斯碑未著於錄推而拓之裝界而藏之古林曹侍郎溶也以八分書其後者布衣秀水朱彝尊也歲在彊圉協洽秋八月朔

跋唐衢州刺史嗣江王禕石橋寺詩

石橋寺在衢州府西安縣南三十里道書第八青霞洞天也康熙壬申冬知縣事鹿君祐邀予往游從寺登山尋仙人對奕所前後洞豁有碑峙其右則唐嗣江王禕所題五言詩以貞元三年正月上石末書朝散大夫使持節衢州諸軍事守衢州刺史賜紫金魚袋韋光輔建文稱刺史韋公于石橋寺橋下以外祖信安郡王詩刻石按新唐書表太宗第三子吳王恰恰第三子琨琬子

禕舊唐書傳禕少繼江王躡後封為嗣江王改封信安郡王景雲開皇中兩為衢州刺史詩題嗣江王當是景雲間初為刺史作也成都楊用修不知薄烟羅遠郊遙峰沒歸翼二語係王詩疑為仙人遺句誤矣

唐郎官石柱題名跋

唐尚書省郎官石柱題名吳郡張長史旭撰記京兆許左丞孟容撰後序記出旭正書後序劉補闕寬夫隸書也二篇別勒於碑而題名錄於柱自貞元後則令史續

書故工拙大小不齊馬唐制尚書省都堂居中東有吏部戶部禮部三行行四司左司統之西有兵部刑部工部三行行四司右司統之各掌十二司事舉正稽違省署符目定其程限吏分設司封司勳考功戶分設度支金部倉部禮分設祠部膳部主客兵分設職方駕部庫部刑分設都官比部司門工分設屯田虞部水部諸司均有壁記詳其改充遷轉之歲月而石柱第注姓名而已康熙戊子予始購得郎官題名三紙字已漫漶眼昏

莫辨會桐城方生來自京師訪予梅會里坐曝書亭鎮以界尺審視之姓名可識察者三千七百餘人別錄諸格紙而同里曹生復以所搨本贈予因言柱在西安府儒學孔子廟庭之右上有古柏覆之竊思六部既分左右則當時立石必東西各一今右司暨兵刑工三部所屬郎官題名無一人者是左存而右已失也若禮部四司闕郎中考功膳部闕員外郎殆由椎拓者遺失爾方生名世舉字扶南曹生名曰瑚字仲經皆受業予之門

跋唐岱岳觀四詩

右唐張嘉貞任要韋洪公孫杲四詩俱刻於岱岳觀碑側而編岱史者不錄任韋公孫三人新舊唐書無攷任又題名云貞元十四年正月十一日立春祭岳遂登太平頂宿其年十二月廿一日立春再來致祭茶宴於茲蓋唐時祭畢猶不用酒故宴以茶也

唐濮陽卞氏墓誌銘跋

康熙二十年秋禁垣西偏中官劉進成宅掘地誤發古

墓中有瓦罌一墓石二方廣各一尺二寸一刻卞氏墓誌四字環列十二辰相皆獸首人身一刻誌銘而書誌作誌又無撰文人姓名第云歸於我彭城劉公而已文稱貞元十五年歲次己卯七月朔夫人寢疾卒於幽州薊縣以其年權窆於幽州幽都東北五里禮賢鄉之平原按憫忠寺有唐人舍利記二一云寺在城東門一云大燕城內地東南隅有憫忠寺門臨康衢則唐之幽州在今都城之西南合之是碑益信

唐游石橋記跋

游石橋記元和元年三月衢州刺史陸庶文庶吳人宰相元方之曾孫象先之從孫希聲之從祖也先世曰玩仕至司空侍中贈太尉其子姓號太尉支元方象先希聲三世相唐新唐書世系表庶歷官福建觀察使當日以貴公孫領郡碑後列親賓接武男子從行是亦好事者親賓二人子壻試大理評事元益前絳州太平縣尉崔纘男子五人右內率府錄事叅軍綜前弘文館明經

繪左監門衛率府兵曹叅軍紹前崇陵挽郎縝按世系表書縱鄮令綜河南府戶曹叅軍繪信州刺史紹潁州刺史惟縝無之宗陵者德宗陵也縝以大臣子弟充挽郎唐制然矣

跋石橋寺六唐人詩

右劉迴李幼卿李深謝劇羊滔薛戎詩各四首刊成二碑留石橋寺嘉靖中尚存都御史江山趙鏜修府志具錄之中間闕文僅六字耳迴字陽卿知幾子大厯初吉

州刺史終諫議大夫給事中有集五卷載新唐書藝文志幼卿字長夫隴西人大厯中以右庶子領滁州州有庶子泉因幼卿得名深字士達兵部郎中衢州刺史滔泰山人大厯中宏詞及第戎字元大元和七年以刑部郎遷河南令歷衢湖常三州刺史終浙東觀察使劇未詳二碑不知何年失去其後官三衢者改修府志乃盡刪唐人之詩深可恨也宋陳耆卿撰赤城志明謝方石續之各為一集合之以行後之君子改修地志者當取

以為法

唐濟瀆廟北海壇置祭器銘跋

山川望秩濟瀆神清源公建廟於濟源縣西北而築北海壇於廟後號廣澤王掌之祠官歲立冬日奉祀其來久矣舊俗廟不設祭器先期令請於上官購諸洛下酬以歲緡所用沉幣之舫則以車遠運沁河渡口貞觀十三年濟源令張洗字濯纓覩廟中楸槐數本為大風所拔用其材製祭器凡百二十有二餘以造雙舫云按爾

雅祭川曰浮沉郭景純注以為投祭水中或浮或沉語
馬未之詳也碑文謂沉幣雙舫蓋舫以浮之幣以沉之
比於郭氏之注義較明晰今山祇川后祠宇恒有車船
置殿左右殆本古祭川遺製爾洗於事神有禮度治人
必有方惜乎斯銘不載圖經而洗之政事亦無表見碑
今藏吳江潘氏稼堂其善藏諸

書唐賈餗華岳廟詩石刻後

元和元年十月著作郎河南賈餗謁華岳廟賦五言詩

題名太和六年四月其姪男宣義郎行華州叅軍事琚
修之修之者殆斂之也詩題北周天和二年趙文淵書
万紐于瑾所撰華岳頌之左方頌之陰則開元八年劉
升書咸廡所撰精享昭應碑也其石勒顏真卿乾元元
年題名工每椎拓三面而遺餽詩以是流傳者寡然其
詩特醇雅顧圖經未之采焉爰裝界書其後

白樂天草書春游詩拓本跋

右白傅草書一十九行錢穆父在越勒石置蓬萊閣下


今長慶集不載或以是詩補入元微之集中誤也散字
廣韻未收而毛晃增注禮部韻略有之引白詩為證且
注云重增然則今之廣韻亦非唐韻之舊矣從雕本謄
終愛雕本謄怯皆所當勘正者

書張處士瘞鶴銘辨後

石墨之傳於今有難以驟讀者天發神識石斷而為三
瘞鶴銘裂而為四又失其腹由是釋文不符覽古者闕
其疑可也移易增益其辭不可也曩在白下得祥符周

雪客神識碑考既序而傳之矣淮陰張力臣秉江水歸壑入焦山之麓藉落葉而仰讀瘞鶴銘辭聚四石繪作圖聯以宋人補刻字倫序不紊且證為顧連翁書蓋連翁故宅雖在海鹽之橫山而學道句曲遂移居於此集中有謝王郎中見贈琴鶴詩鶴殆出於性所好斯瘞之作銘理有然者自處士之圖出足以息衆說之紛綸矣力臣名弢精書法嘗為顧處士炎武寫廣韻及音學五書手摹家藏弢彙欸識遺予惜不營生產沒後盡散失

并傳刻棗木悉歸之閩人可歎也



六藝之一錄續編卷三

欽定四庫全書

子部

六藝之一錄續編卷四至八

詳校官中書臣陸湘

貢外郎臣牛稔文覆勘

總校官檢討臣何思鈞

校對官中書臣陸湘

謄錄監生臣曹夢齡

欽定四庫全書

六藝之一錄續編卷四

錢唐倪濤撰

石刻題跋

朱彞尊竹垞甫曝書亭集

榆次縣三唐碑跋

去榆次縣三十里趙村有穹碑三中央一通仆地折爲
二段贈太保李良臣碑也其辭李宗閔撰楊正書立於
長慶二年右一通安定郡王李光進碑也其辭令狐楚

撰子季元書立於元和平蔡之後左一遁太尉李光顏
碑也其辭李程撰郭虔書立於開成五年良臣本河曲
部落稽阿跌之族襲雞田州刺史隸朔方軍其稱太保
者以子貴贈官光進光顏皆以功蓋天下時人以大小
大夫別之兄弟孝睦見於舊史而碑稱光顏平吳元濟
師旋請於朝葬其兄則史傳所未及又碑書光進為安
定郡王史沒其文吾意碑辭定不誣矣

湖州天寧寺尊勝陀羅尼石幢跋

湖州天寧寺建自陳永定三年武宣章皇后故宅也曰龍興曰孝義曰萬壽曰報恩光寺寺額屢更其曰天寧者仍吳越武肅王所更額也相傳寺有尊勝陀羅石幢一十四座今其八尚存文可辨識者一建於大中元年十一月後題刺史令狐綯姓名一建於大中二年八月後題刺史蘇特姓名書者曹巨川也一建於大中十二年四月書者凌渭也一建於會昌元年十一月書者胡季良也一建於咸通十一年三月又斷石一平望芮文

琛立後題乾符六年四月蓋平望驛時屬烏程澄源鄉
宜陽里故張承吉詩云一派吳興水西來此驛分斯其
證矣巨川及渭莫考季良見宣和書譜載其行草書各
五種考諸家紀錄金石文字太和八年湖州德本寺碑
陰係季良正書寶曆二年杭州大覺禪師碑元和二年
平李錡紀功碑均係季良八分書元和四年國子司業
辛璿碑九年永興寺僧伽和尚碑均係季良篆額是季
良於書法諸體精熟不獨行草見長矣惜也幢第稱曰

處士而不著其里貫疑卽州人至繪畫人魚簡則畫譜未詳僅見於此予友鄭元慶芷畦撰湖州府志手拓諸幢文見示予嘉其見聞之周洽也書冊尾歸之

唐阿育王常住田碑跋

右唐阿育王寺常住田碑秘書省正字郎萬齊融撰其初趙州刺史徐嶠之書既隳於寇明州刺史于季友於僧惠印所觀舊文邀處士范的重書太和七年冬事也寺建於晉太康二年田賜於宋元嘉二年額更於梁普

通三年釋道宣錄神州塏寺以是塏居第一馬碑題越州都督府鄆縣者齊融神龍中與賀知章賀朝張若虛邢巨包融等俱以吳越之士知名見劉昫唐書文苑傳國秀搜玉二集曾載其詩唐書以賀朝萬為一人齊融為一人誤矣唐自武德四年諸州置總管未久更都督府至乾元元年始號越州而鄆縣即古鄆州開元二十六年始割縣置明州齊融撰碑時寺猶屬越州也碑引詩倬彼甫田歲取十千以甫作碩不知何所本其陰有

記則於季友辭附贈范的詩的亦有和韻之作胡氏統
籤李氏全唐詩均未之載季友太保頤次子也尚憲宗
女惠康公主拜駙馬都尉授羽林將軍制係元稹所草
史不言其為明州刺史宰相世系表第書絳宋等州刺
史云

憫忠寺重藏舍利記跋

右采師倫書重藏舍利記在京師憫忠寺碑建自唐會
昌六年文稱舍利舊藏智泉寺寺經始於元魏幽州刺

史尉萇命故又號尉使君寺按北史萇命太安狄那人
萇作長參預齊神武起兵破爾朱兆者其曰節制司空
清河張公者仲武也當武宗詔毀佛寺地分三等幽州
等居上許留僧二十人尋又詔諸道留二十人者減其
半故碑云勅於封管八州內寺留一所僧限十人至是
年宣宗即位遂弛其禁先是智泉寺已燬遂以舍利歸
憫忠寺焉仲武在幽州屢破回鶻鄭畋謂會昌時功第
一方燬寺之歲五臺僧多奔幽州仲武封二刀付居庸

關曰有游僧入境則斬之及宣宗增置僧寺碑稱司空
因護釋門殷誠修敬若是乎前後不相侔者蓋仲武功
名之士宜其好惡與時移也師倫無善書名然猶存王
知敬薛稷遺意亦能拔乎俗者

唐漳州院陀羅尼石幢跋

右唐咸通四年八月漳州押衙兼南界游奕將王嗣所
造陀羅尼石幢宣義郎前建州司戶叅軍事劉鏞序并
書經後題朝議郎使持節漳州諸軍事守漳州刺史柱

國崔衮名又分書建立歲月及鐫字人於後按遊奕將
五代十國多有之獨不見於唐會要新舊書惟六典載
駙曹掌外府兵馬簿帳牧畜之事凡諸衛馬丞直配於
金吾巡檢游奕者李請其料給之殆職巡邏者已是帖
今藏吳江潘檢討稼堂家審定為宋拓本

唐北嶽廟李克用題名碑跋

曲陽縣北嶽廟有唐李克用題名一百二十八字文稱
中和二年二月者即光啟元年攷僖宗以是年二月至

鳳翔三月還京改元之詔猶未下也克用與義成節度使王處存同破黃巢以功封隴西郡王而盧龍節度使李可舉成德節度使王鎔惡處存約共滅之分其地通鑑載克用遣將康君立救之而碑文則云領蕃漢步騎五十萬衆親來救援與通鑑異又云至三月幽州請就和斷遂班師取飛狐路却歸河東則又史所不及載者當唐之季藩鎮連兵境上各事爭鬪職方不錄其地朝廷號令所及僅河南山南嶺南劔南十數州上下不交

以至於无邦生斯世者其聞見已不能悉真况百世之
下寧免傳聞異辭哉惟金石之文久而未泐往往出風
霜兵火之餘可以補舊史之闕此好古之士窮搜於荒
厓破冢之間而不憚也克用本武人未嘗以書知名而
碑文楷畫端勁詞亦簡質可誦英雄之不可量如是夫
嗚呼益以見金石之文為可寶也

憫忠寺葬舍利記跋

右唐景福元年僧復嚴葬舍利於憫忠寺觀音像前於

是南叙述記知常書之碑云隴西令公大王者李匡威
也是歲李克用王處存合兵攻王鎔匡威救之有詔和
解河東及鎮定幽四鎮碑稱欲遷舍利於閣內陳辭請
發封壤上許之蓋匡威方恃燕薊勁旅有雄天下意宜
有請無不許者碑文侈陳發緘時舍利光芒異香郁烈
外石函封內金函闕其崇奉象教至矣迨明年匡威復
出師救鎔其弟匡儔據軍府自稱留後匡威進退無所
之鎔迎館於鎮登城西大悲浮圖顧望流涕未幾以圖

銘見殺然則事佛果得福乎舍利之塋一燔於太和八年一燔於中和二年今匡威所建之閣遺跡已不可問其碑僅存焉耳已踣佛脚俾工拽而出之揭以藏諸筭

唐濟安侯廟二碑跋

乙丑秋客自華州來者貽予唐李巨川所為濟安侯廟碑濟安侯者華之城隍神也巨川為韓建掌書記撰許國公勤王錄以媚建方昭宗幸華建請散殿後軍誅李筠圍諸王十六宅皆巨川教之唐史附諸叛臣之列觀

其碑文盛歸功於建此猶獠犬狂吠無足怪者繼得金
張建所撰廟碑謂諸王既見殺是夜建袖劔詣行宮將
及御幄神厲聲叱曰汝陳許間一卒耳蒙天子恩至此
輒敢為弑逆事乎建倉皇而退昭宗德之徙神於行宮
既還京封神濟安侯而歐陽子五代史則謂建父叔豐
所誠殆儒者不語怪之意歟金源之文傳世者寡碑辭
特剴切可誦其稱縛草傳泥假以成像猶能奮叱不祥
而當時藩鎮重臣皆幸時之亂曾不遣偏裨老弱之師

為衛社稷勤王計殆土木之不若蓋有激其言之矣彼
巨川者罔有忌憚謂土木可欺已之文足以飾非於後
不知直道在人自唐迄金二百年華之父老猶能道之
而張建者復刊石而紀其實也然則小人之變亂是非
欲以惑天下後世者復何為哉復何為哉

晉王墓二碑跋

代州柏林寺東晉王李克用墓斷碑一其一曰唐故左
龍武軍統軍檢校司徒贈太保隴西李公神道之碑文

曰公諱國昌字德興世為隴西沙陀人偉姿容善騎射
蓋克用之父朱邪赤心所謂赤馬將軍火生頭上者也
其一曰唐故使持節代州諸軍事代州刺史李公神道
之碑文曰公即太保之次子也其名克字僅存餘可識
者有公前躍馬彎刀及徐方等數字按史克用第四人
次曰克讓為振武軍校從討王仙芝以功拜金吾衛將
軍宿衛京師親仁里第自克用稱兵雲中殺守將段文
楚詔捕克讓克讓與僕十數騎彎弧躍馬突圍出奔雁

門與碑文合則為克讓無疑但史載克讓守潼關與黃巢兵戰敗匿南山佛寺中為寺僧所殺不言其為代州刺史又得歸葬於代皆不可曉者土人相傳王墓上舊有碑十三今十一已亡其二存者又散埋土中蓋金石之文自歐陽永叔趙明誠後世無篤好之者宜其漫漶不可辨識如是也當永叔時去五代甚近沙陀世次已不得詳其為唐家人傳謂太祖四弟皆不知其父母名號至國昌字德興紀亦遺之是十三碑者永叔亦未之

見更六百年而予乃覩其二非幸歟惜乎十一碑者不及見也同邑曹先生博采金石有歐陽趙氏之好出二碑於土摹之搨本俾予審定其字若干遂書其後歸之

千峰禪院勅碑跋

右澤州盤亭山千峰禪院後唐明宗賜僧洪密勅蓋明宗踐位洪澤具表稱賀以此答之文曰退避無所愧惡良多嗚呼五代之季安得聞此長者之言哉歐陽子謂明宗武君不通文字觀署書數大字出自親判上有壘

金史四庫全書
卷四
日書詔新鑄之印可異也

晉義成節度使駙馬都尉史匡翰碑跋

史駙馬匡翰墓在太原縣東北三十里黃陵村墓碑深陷於地村民語予土不可搨搨之尺則更深尺予強令搨之以畚去土至一尋龜趺始露驗之則陶學士穀所撰文也辭多駢儷乃抄撮其大略云天祐中授代州副使以勞加銀青光祿大夫檢校太子賓客兼監察御史改遼州副使兼領九府都督同光初充嵐憲朔等州都

游奕使解職授天雄軍牢城都指揮使遷檢校刑部尚書兼御史大夫上柱國轉檢校戶部尚書潯州刺史未幾改天雄軍步軍都指揮使遷侍御彰聖馬軍都指揮使兼九府都督進檢校司空懷州刺史轉控鶴指揮使加金紫階兼和州刺史駙馬都尉食邑五百戶俄遭內艱起復授冠軍大將軍右金吾衛大將軍員外置同正員依前充義成軍節度使以天福七年三月薨於鎮詔贈太保其先後歷官詳矣然史稱其歷鄭州刺史而碑

不書何歟又傳美其好讀書尤喜春秋三傳與學者講
論不倦碑辭亦云懷鼓篋之心行有餘力蘊飛箝之辨
似不能言不積財而但富藏書不憂家而惟思報國求
諸時彥罕有倫焉則與史傳合矣

建雄節度使相里金碑跋

汾陰縣有大相里小相里相里氏子孫聚族居焉按相
里氏東周時即有之莊子稱相里勤之弟子是也漢有
御史武十六國前趙有偏將軍覽大都皆晉人也金墓

在小相里之北繹碑辭與五代史傳略同惟史稱字奉金而碑云字國寶史稱贈太師而碑云贈太子太師則碑為可信已

鎮東軍牆隍廟記跋

鎮東軍牆隍廟碑施宿撰會稽志張湜續之均不載其文字予友顧徵士寧人獲諸卧龍山西岡上未入金石文字記中碑文錢武肅王鏐撰王以乾寧二年伐董昌明年五月平之十月勅改越州威勝軍為鎮東軍授王

領鎮海鎮東等軍節度使至開平二年升為大都督府亦謂之東府題曰牆隍廟者朱全忠之父名誠王既稱臣於梁不得不為之諱矣獨怪全忠未篡弒時唐帝在位乃勅改武成王廟曰武明成德軍曰武順義成軍曰宣義并嫌名皆避之迨梁既僭位司天監以帝曾祖諱茂琳請改歲月陽日辰凡戊字更作武尤可發笑也

北漢千佛樓碑跋

丙午二月登天龍之山得北漢李暉所為千佛樓碑異

馬俾工搨歸裝潢之書其後曰北漢之為國不足當一大郡而王朴以為必死之寇亡最後自周之世宗宋之太祖百戰不能克宜其君臣有過人之才而劉繼元處裹瘡吮血之餘輕役其民命嬖臣范超冶金為佛治不急之務憚身為相臣不能匡正惟事圍棊飲酒及撰碑文侈大其事何歟碑稱承鈞為睿宗皇帝繼元為英武皇帝皆史記所未及劉旻之語張元徽也顧我是何天子爾亦是何節度使然則憚之夸大其辭適足以形其

陋而已攷繼元之立在宋開寶元年戊辰史稱其即位時改元廣運而碑建於乙亥故其文曰上御宇之八年後書廣運二年歲次乙亥按楊夢申撰劉繼顥神道碑亦稱廣運元年歲次甲戌與是碑合則即位改元之說史未得其詳矣繼元殘忍好殺具書於史然當時諸臣率奔之降宋范超者亦降惟惲至國亡乃降蓋其誅戮亦所必行無足深罪者嗚呼以蕞爾之地當百萬之師而民爭為之効死其君臣真無過人之才者哉若其文

格之卑書法之陋攷古之士無譏焉可也

宋太宗書庫碑跋

右宋太宗皇帝書庫碑大中祥符四年真宗御書勒石
在太原府壽寧教寺碑為風雨崩剝其半没土中歲久
盡蝕文凡二千餘言僅存數百字其陰石尤泐所可識
者有太宗御製文集四十卷又集一十卷怡懷詩一卷
迴文詩一卷逍遙詠一卷至理勤懷篇一卷宋志載御
製集一百二十卷蓋統言之也棊勢圖琴譜各二卷蓮

花心漏迴文圖若干卷雜書扇子一百三十六柄雜書
簇子七百五十三軸按史帝既削平諸國收其圖下詔
購遺書於左昇龍門北建崇文院徙三館書實之此宗
文書目所自始也又分三館書萬餘卷別為書庫所謂
秘閣是也王明清有言太平興國中諸降王死其舊臣
或宣怨言太宗盡收用之寘之館閣使修羣書廣其卷
帙厚其廩祿贍給以役其心俾卒老於文字則帝之留
意翰墨特出於權謀秘計而非性所好也雖然亡國之

臣世主往往輕視之如土芥而重繩之以刀鋸帝獨容之禁侍之列給筆札事纂述謂非世主所難能歟嗚呼是可記也

太原縣惠明寺碑跋

呂惠卿儉人也當時君子視若鬼蜮而王安石獨任之不疑且曰惠卿之賢雖前世儒者未易比也今觀惠明寺舍利塔碑雖能文善書之士無以過之世徒知為頭會算歛之才不知兩人當日以經術定交而取合於文

字也嗚呼此其所以為姦也歟

桂林府石刻元祐黨籍碑跋

元祐黨籍徽宗書之立石端禮門其初九十八人爾既而蔡京復大書頒郡縣以上書人及已所不喜者作附麗人添入凡三百九人碑稱皇帝嗣位之五年蓋崇寧四年也是時籍中曾任宰臣執政者十無一存曾任待制及餘官亦已零落過半亡者毀其繪像及所著書奪其墳寺存者定為邪等降旨編管荒徽禁不得同州住

其子弟亦不得詣闕下小人之快意未有甚於斯時者矣豈復有所忌憚乎其後張綱看評謂王珪一名不合在籍自九十七人外益以上官均岑象求江公望范柔中鄧考甫孫諤六人共一百三人皆係名德之臣許子孫陳乞恩例次數而龔頤正遂采三百九人之事蹟成元祐黨籍列傳譜述一書凡一百卷蓋惟恐其闕然則小人之厄君子適以榮之士之自立宜審所擇矣京所書刊石滿天下惟桂林勒之崖壁故至今獨存碑後王

珪章惇姓名漫漶者為曝泉所泐也康熙乙丑二月望
日書

大同府普恩寺碑跋

右大同府普恩寺碑記宋修武郎借吉州團練使充通
問副使婺源朱公弁所作也公以建炎元年十一月奉
使為金人所留迫之事劉豫不可欲易其官不可探策
使之歸復不可其語耶律紹文曰上國之威命朝以至
則使臣夕以死夕以至則朝以死觀其懷印卧起悲歌

慷慨與漢之蘇武何異非孔子所稱不辱君命者歟記成於金皇統三年二月實高宗紹興之十三年也於是公之去國蓋十七年矣題曰江東朱弁而不書官又其上系以皇統年號論者疑公自貶其詞合乎古君子危行言孫之義而未得其本也攷公之歸宋在是秋七月記之作當在和議初成而公臨發之時也彼寺僧者見公既去不能原公大節所在惟知奉國人之法輒刪去其官爵增易其紀年無足怪者史載公被留時嘗具酒

食告僚友曰吾已得近郊某寺之地一旦畢命諸公幸
瘞我其處表曰宋通問副使朱公之墓於我幸矣而公
碑文亦曰予築館之三年歲在庚戌冬十月乃發於茲
寺然則所謂近郊某寺者殆即普安寺非耶史又載公
以文字教金之貴人子弟使之就學因得以和好之說
進蓋公之文有不得已而為之者當其時宋諸公留於
金若宇文虛中吳澈蔡松年之徒多以文學自命顧寺
僧獨以公之言為足重於世亦以見恭敬之不可棄而

忠信所行者遠也嗚呼士君子不幸生喪亂之際又不幸以文章為世所重得其文者或不原其志意所在輒更易以就時人之耳目至使大節皎然若朱公者幾無以自白於後世讀普恩寺之碑其亦可感也夫

書拓本玉帶生銘後

玉帶生宋文丞相硯名也石產自端州未為絕品其修扶寸廣半之厚又微殺焉帶腰玉而身衣紕丞相寶惜旁刻以銘書用小篆凡四十有四字歲甲申觀於商丘

宋節使坐上因請以硬黃紙摹之不敢響搨也生之本末略見玉筍生詩其銘辭亦附注於詩編按金華胡翰作謝翱傳稱天祥轉戰閩廣至潮陽被執翱匿民間流離久之間行抵勾越信公軍敗後硯即歸翱可知其寓浦陽永康閱祐思諸陵登釣臺度必攜生偕往懷古之君子可以深長思矣

遼釋志願葬舍利石匣記跋

京師仙露寺金人俘宋室子女置其中見蔡條北狩行

錄趙子砥燕雲錄顧地志失載遺踪遂不可稽康熙二十六年五月宣武門西南居民掘地得石匣匣旁有記自稱講經律論大德志願錄并書乃遼世宗天祿三年瘞舍利佛牙於此記後有千人邑三字蓋社名也施主姓名首列帝后諸王大臣下及童男小女考遼史世宗妃甄氏後唐宮人帝從太宗南征得之寵遇甚厚及即位立為皇后至天祿四年方冊立皇后蕭氏二后同死察割之亂並葬於醫巫閭山記刻於三年所云皇后蓋

指甄也東明王者疑是明王安端即察割之父以功王
東丹國故曰東明王也燕主大王者中臺省右相牒蠟
為南京留守封燕王故曰燕主大王也國舅相公者靖
安蕭太后族只撒古魯以天祿元年為國舅帳詳穩故
曰國舅相公也獨趙思溫子延照史作延昭而通鑑亦
作照嘗為石晉祁州刺史復仍歸遼餘子本末不得其
詳矣又記有建寧塔坡之文疑當時石匣置於塔下塔
久廢而石匣僅存土中匣已無蓋其舍利佛牙又不知

何如散佚也

按跋內察劉諸名應
改因碑刻故存其舊

遼雲居寺二碑跋

右王正智光雲居寺二記共勒一碑碑額篆書重修雲
居寺一千人邑會之碑一稱結千人之社一千人之心
一稱完葺一寺結邑千人近年京城發地得仙露寺石
函記後有千人邑三字尼曰邑頭尼覽者疑是地名合
此碑觀之則知千人邑者社會之名爾天順皇帝者遼
穆宗尊號丞相秦王者重元為南京留守也遼史聖宗

初即位羣臣上尊號曰昭聖皇帝統和元年六月上尊號曰天輔皇帝五年四月上尊號曰至德廣孝昭聖天輔皇帝二十四年十月上尊號曰至德廣孝昭聖天輔皇帝今碑建於二十三年尊號無天輔字是則二十四年十月以前聖宗尊號但云至德廣孝昭聖皇帝如碑所記至二十四年乃合元年尊號天輔字以稱之否則二十四年所上之號與五年無異何用羣臣復上乎竊疑史有誤也

金京兆劉處士墓碣銘跋

金京兆劉處士墓碣銘奉天楊英撰文武功張徽書洛陽李微題額立石者同知京兆總管府事高貴也文稱處士初諱章更名九隴又名渭又名於菟其字希文不易也下筆有骨肋西州碑版多出其手一榻之外皆法書名畫望而判其真贋嘗鬻書於市一達官持之去處士直詣廳事取書辭色不少遜挾書掉臂而出性不喜浮屠法而處開元堦三十年無家無妻子正大八年詔

民東徙至陝既而事且變投所畜古印章鼎彝於河避地平陽入太原尋還故里以疾卒按金史哀宗紀元兵既取鳳翔兩行省棄京兆遷居民於河南所云事變者此矣英之銘曰士之遇也為龍為虎其不遇也如魚如鼠既魚其龍又鼠其虎生必達其所好死則從其所惡將矯世以自戕抑直行而不顧苟會於心千載其猶旦暮者所以信於人者以銘先生之墓吁辭特崛竒而微正書多涉篆隸體亦不猶入金源遺集傳至今者惟趙

秉文王若虛段克已誠已李俊民元好問數家而已斯
銘不見於載記乃撫其大略書之冊尾兼錄其副示長
洲孫生附著於書法考焉

元豐潤縣令碑記跋

豐潤縣本玉田之永濟務金史稱太和間置明寰字通
志一統志因之今觀至元七年縣令孫慶瑜碑記則改
務為縣乃大定年事且云承安中以懷遠大將軍夾谷
公習捏來宰是縣足徵置縣在泰和之先也碑又云太

安初避東海郡侯諱更名曰豐閩東海郡侯者即衛紹
王然則縣始置時仍名永濟可見又云大朝開創以來
庚辰之歲改縣為閩州考元史竟未之載宋王諸公未
免失於討論矣清類天文分野之書云洪武元年改閩
為潤而今國子監金元史雕本閩旁均着水非也碑之
書法雖不工然辭足以達其述先後政頗詳顧修地志
者曾不引證何哉

按跋內夫谷應改承爾佳習捏應
改錫納因載碑刻原文故仍其舊

霍山廟建文元年碑記

右霍山廟碑建文元年正月壬午祇祭上帝於南郊二月癸亥鴻臚寺序班周教國子監生袁綱奉命以香幣牲醴祭告中鎮勒其文於碑嵌廟西壁上蓋自燕師靖難之後四年之政事悉行革除舊典遺文去之惟恐不盡乃普天之下尚留此一片石存人間世之君子有志於補修惠宗實錄辭雖不多所宜大書特書布在方策者也

跋首善書院碑

萬厯丁酉先太博文恪公偕福清葉文忠典應天鄉試
得華亭呂公原先生卷先文恪欲置第一文忠謂是卷
文雖高恐不得第欲以所擬第二人領解先文恪曰此
時文爾雖第與不第等未若不第者之文其人必以學
行聞於時遂定先生卷第一後先生試禮部輒擯落謁
選人官工部司務是時鄒忠介馮恭定講學京師於宣
武門大時雍坊建首善書院先生與周忠毅董其役而
先大父時為都察院照磨實經營之及書院成文忠作

記董文敏書之則先大父已遷官故未得書於石也繼而羣小交攻毀書院而碎其碑傳聞碑初立時祇搨一十三紙而先生藏其二至崇禎壬申文敏起自田間桐城孫舍人國教請重書是碑文敏謂曩曾書二碑一置書院一為王評事應遴摹勒藏壁間為御史某徙置中城察院官舍訪之果存其後西洋人借書院以為厯局久之遂踞其中甲申春李自成入寇中城所藏之碑亦不可問矣康熙辛酉予復主江南鄉試先生之孫嘉先

持搨本見示又六年嘉先子天右持至都將重勒上石
請予跋其尾予母華亭唐文恪公孫也先君安度先生
侍先太傅於京邸兩家結婚先生實為行媒今兩家子
姓仇偶坎壈先代賜書俱已零落而先生後人猶能於
兵火之餘裝潢是碑守以勿失摹而刻之俾覽觀者仰
先儒之典型可以識君子小人存亡進退之故是碑傳
書院雖毀安知無有復之者則嘉先父子之功不可泯
也巳

六藝之一錄續編卷四

欽定四庫全書

六藝之一錄續編卷五

錢唐倪濤撰

石刻

錢塘吳焯尺鳧武林石刻題跋

司馬池周駢錢聿石再寶陳嘉謨謝景伯馬元

康同游此寺康定元年中秋二十四日元翼題

右刻在
龍華寺

咸淳臨安志龍華寺為吳越錢王之瑞夢園開運二年



王弘佐舍為寺造傅大士塔宋真宗大中祥符元年改名龍華寶乘院後建司馬溫公祠堂相傳兵部公為守時溫公常來省侍今寺內有兵部題名即此段摩崖是也考郡守表仁宗寶元二年八月池自知同州為兵部郎中來知杭州明年為康定元年因兩浙轉運使江鈞張從草之劾九月降知虢州是公守杭凡一年案本傳池字和中自言晉朝後居夏縣中第初授永寧主簿歷建德郡縣尉調鄭州防禦判官知光山縣改秘書省著

作佐郎監安豐酒稅徙知小溪縣辟知河南府司錄叅
軍進通判留守司因薦為羣牧判官除開封府推官即
罷知耀州擢利州路轉運使知鳳翔府累遷尚書兵部
員外郎兼侍御史更戶部度支鹽鐵副使擢天章閣待
制知河中府徙同州又徙杭州降知虢州徙晉州卒此
公歷官之終始守杭日已遷待制非復兵部郎矣溫公
傳稱寶元初中進士甲科年甫冠除奉禮郎因池在杭
求簽蘇州判官事以便親許之此志所云溫公常來省

侍是已考池之去杭傳言其性簡易剽劇非所長不知
吳俗以是譏謗聞朝廷轉運使江鈞張從草劾其決事
不當十餘條及稽留德音遂降號州適更有盜官銀稱
為鈞償私費又有私物盜稅為從草之姻或謂可以此
舉劾池不肯人稱長者此正公守杭時事怨不修報宜
乎司馬氏之有後也公僅傳其行色絕句一篇其他著
作不槩見守杭日有論兩游不宜添置弓手狀詳叙吳
越風俗係溫公代作見於傳家集雖溫公有題先公遺

文記考諸簿錄並無遺文傳世觀此題名亦猶荆山片玉得見者幸矣惜乎周駸以下諸名皆莫之考然觀司馬公為人其取友必端矣

蘇軾王瑜楊傑張璠同游龍華元祐五年歲次

庚午三月二日題

右刻在龍華寺

坡公題名吾杭凡數處登雲靈鷲韜光龍泓字跡久湮沒石屋幸存乃黨錮時鐫去後人重刻者惟此段摩崖雖經剝蝕猶然舊跡校之表忠碑書法大有間矣案公

年譜元祐四年三月自龍圖閣學士知杭州六年六月
召還題名之歲公年五十五是歲方濬湖有開西湖狀
及論高麗僧統義天進金塔事而此題名之楊傑字次
公無為人以郎官奉詔伴高麗僧游錢塘見于公送傑
詩序而傑撰龍井寺記亦叙其事此公所謂無為子以
王事而從方外之樂者是也傑本傳但言元祐中為禮
部員外郎出知潤州除兩浙提點刑獄卒曾不言因高
麗出使事是亦史家之闕已瑜字中玉洛陽人璠字全

翁安陸人又見坡公龍井題名載在咸淳臨安志考公
詩有連日與王中丞張全翁游湖上之作約在是年而
詩有明朝寒食之句却是三月初之時其云故應千頃
池養此一雙鵝二人殊不凡是不獨得其人亦可想
見當年從游樂事而余上下千年為之考證殊可自喜
第志載韜光大麥嶺題名並同此姓名麥嶺與此時日
亦同而此段志中不載而麥嶺之題實無歲月總因公
書多半銷毀後人摹倣盡失其真試觀此書嶽嶽英氣

動人習蘇家法者鑒之

慶元二年二月十四日春分祀高禔括蒼何澹

以同知樞密院事充初獻齋宿於龍華 慶元

三年二月二十六日春分澹以叅知政事復充

高禔初獻齋宿 慶元四年九月祀上帝臨海

謝深甫以知樞密院事兼叅知政事充初獻齋

宿於寺 慶元五年二月十八日春分禔祀澹

以叅知政事充初獻齋宿 慶元六年孟夏望

日雩祀上帝澹深甫以右丞相充初獻齋宿

五月十六日禱雨祀上帝深甫充初獻 慶元

六年冬至祀上帝長樂陳自强簽書樞密院
事充初獻齋宿 嘉泰元年二月八日春分禱

祀澹以知樞密院事兼叅知政事充初獻齋宿

嘉泰元年雩祀上帝深甫充初獻齋宿 五

月十八日禱雨祀上帝深甫充初獻齋宿 嘉

泰二年四月雩祀上帝自强以叅知政事兼知

樞密院事充初獻齋宿 嘉泰二年九月九日

同知樞密院事表說友以秋季祀上帝齋宿於

此 嘉泰癸亥四月壬子簽書樞密院事廣都

費士寅齋宿以雩祀上帝充初獻也 開禧初

元二月二十三日祀高禩廣陵張巖以叅知政

事充初獻齋宿龍華寺 開禧初元四月十一

日雩祀上帝吳越錢象祖以叅知政事兼同知

樞密院事充初獻齋宿龍華寺 開禧元年九

月八日祀上帝自強以右丞相充初獻齋宿

開禧二年孟夏雩祀上帝自強充初獻齋宿

開禧二年長至日祀昊天上帝眉山李璧以叅

知政事充初獻齋宿龍華開禧三年正月初

四日上辛祈穀自強充初獻齋宿

右刻在龍華寺

右皆宋寧宗朝宰相何澹字自然龍泉人謝深甫字子

肅臨海人陳自強字勉之閩縣人張巖字肖翁潮州人

李璧字季章眉州人史皆有傳袁說友自題建安別見

題名紹熙三年知臨安府咸淳志郡守表稱安吉州人不知何據錢象祖以慶元元年知臨安府志稱台州人武肅王裔也方是時韓侂胄弄權僉人附麗而起如自強才四年以選人登樞府貪鄙不堪後至籍沒死貶所他如澹作心在南園之書巖受朋姦誤國之劾一以早退得免一以主恩見原其不幾於自強者幸爾獨惜深甫平生力學為考官文士盡得入水衡為給事禁庭不敢布恩澤妄人余嘉請誅偽學深甫擲其書欲奏譴之

殆亦能自立者矣何至一附侂冑遂劾罷陳傅良請逐
趙汝愚晚節不終操守盡喪又如壁希開邊之旨遂草
出師之詔其詆秦檜和議非公心即助彌遠誅姦亦反
復幸有西山銘辭與申衷曲雁湖傳集洵屬文人象祖
無專傳見於壁傳者稱其沮開邊之議以得罪去後復
與彌遠同相碌碌無所短長說友士寅雖登政地徒伴
中書史傳闕之有由然矣余嘗觀古來清流之禍漢之
黨錮宋之學禁始於君子之嫉邪終快小人之私憤然

志節由之而衰國步亦因之而改正行國之綱也善言
國之紀也綱隳而紀弛事焚而亂作論一朝邪正各從
其朋論一人終始亦異其轍覩諸題名核之史傳遺名
不滅行跡愈彰於此觀之良可慨已

紹熙五年冬至簽書樞密院事豫章京鏜祀上
帝齋宿於寺 慶元改元季秋鏜以知樞密院
事再齋宿於此 二年孟夏雩祀上帝鏜以右
丞相充初獻仍齋宿於此 三年鏜以右丞相

充雩祀初獻齋宿於此 五年四月鏜復齋宿

於此仍以右丞相充初獻 六年春分祀高禩

鏜復以右丞相充初獻齋宿於此 慶元四年

冬至日祀昊天上帝永嘉許及之以同知樞密

院事充初獻 慶元五年九月十二日祀上帝

同知樞密院事許及之充初獻

右刻在
龍華寺

紹熙五年七月甲子寧宗受禪宰輔年表是年九月壬

申京鏜以刑部尚書除端明殿學士簽書樞密院事十

二月庚午除叅知政事明年慶元元年四月己未除知樞密院事二年正月庚寅進右丞相三年迄五年鏗獨相六年閏二月庚寅除少傅左丞相封冀國公八月丁酉卒許及之以慶元四年八月丙子自吏部尚書除同知樞密院事六年六月戊申以母喪去位嘉泰二年十一月庚戌復除叅知政事三年五月戊寅除知樞密院事四年四月甲辰罷時以開邊降兩官泉州居住卒祭禮志祀典領於太常歲之大祀正月上辛祈穀孟夏雩

祀季秋大享明堂冬至圜丘祭昊天上帝又云冬至圜
丘夏至方丘然太祖乾德元年十一月合祭天地於圜
丘元祐郊祀天地皆合祭亦有冬至不祭改用正月上
辛者惟雩祀總以四月蓋為百穀祈膏雨也左傳龍見
而雩注角亢見時周之六月即夏之四月此舞雩之義
荀子曰天旱而雩爾雅螻蛄為雩郭注云虹也然則雩
祀斷於四月自古為然與冬至之祀上帝並云祀也又
禮志慶厯中太常請皇帝獻天地配帝用爵初獻以匏

亞以木今云充初獻者光寧之間皇帝未嘗親郊故以宰相攝事然踐君之位代君之儀未可云充也本傳鏜字仲遠豫章人金人來問弔鏜為報謝使金制宴使臣例用樂鏜以國喪請免宴撤樂遺書極言其不可金人以甲士露刃迫之不從卒如其請及當國諂事韓侂胄排斥道學史言其節操盡喪及之字深甫永嘉人亦事侂胄者然鏜頗負文望及之分書二段絕佳鄭寅之論云隸以規為方此書實盡之而書家不錄何也

慶元六年八月吏部尚書建安袁說友四以奏

告齋宿於此

右刻在
龍筆寺

宋寧宗在位之六年時光宗為太上皇以是年是月大
行本紀書是月庚寅以太上皇違豫赦畧不書祭告攷
孝宗本紀淳熙十四年十月辛未以太上皇不豫赦癸
酉分遣羣臣禱於天地宗廟社稷則因疾致禱固宋朝
家法本紀但書赦而失奏告此史家之漏也再攷宋制
歲祀上帝者四春祈夏雩秋饗冬報並皆遣官行禮此

國之常儀史故不特書今題云四以奏告惟是月為太
上致禱其三大抵為歲祀而至耳何以言之說友之為
吏部尚書當在慶元四年八月本紀於是月書以吏部
尚書許及之為同知樞密院事慶元盡六年即接嘉泰
本紀書嘉泰二年八月以吏部尚書來說友同知樞密
院事是則及之既遷說友繼之而自慶元四年至六年
國家無大奏告事故斷其為歲祀而至雖說友於史無
傳是可推而擬之也從來碑版之文每補史家之訛漏

即此題名可證又咸淳志載光宗紹熙三年說友知臨安府四年除戶部侍郎罷府事注云說友安吉州人而此云建安可訂志中書籍之誤說友著述無傳惟播芳大全載其浙東提舉到任謝表有云曾下下之考而未書迺皇皇者華而遽遣屬辭甚工又可知其嘗官浙東云

淳熙八年閏月甲午駕幸玉津園王希呂韓彥直閻蒼舒鄭丙洪輝王佐施師點趙汝恭孟經

葉翦賈選木待問字文价以扈從至此

右題名凡十三人王希呂字仲行又字仲衡宿州人淳熙五年由江西轉運副使入為起居郎除中書舍人給事中至吏部尚書韓彥直字子溫蘄王子乾道中自鄂州都統制勾歸文班歷任尚書爵至蘄春郡公淳熙二年曾知臨安府鄭丙字少融長樂人積官吏部尚書終端明殿學士史槩不著遷除歲月未知是年所居何官施師點字聖與上饒人淳熙八年權禮部侍郎除給事

中十年除簽書樞密院事尋叅知政事右四人宋史有
傳王佐紹興十八年進士及第咸淳臨安志佐以淳熙
七年十一月除試工部尚書兼知臨安府十年罷然則
是年官職之可考者惟師點之給事中與佐之京尹而
已本紀葉翥以慶元二年四月由吏部尚書簽書樞密
院事四年七月罷賈選以淳熙九年十一月使金賀生
辰宇文价名見師點傳弟稱金使館伴與選並不書官
本待問永嘉人隆興元年進士及第嘉泰二年知禮部

貢舉有御札見咸淳志西湖志云待問字應之洪邁壻
記孝宗論木姓始子貢之語今自題曰韞之西湖志之
誤周益公加食邑待問草制除樞密使价草制並見南
宋相眼二人皆直玉堂者也閩倉舒蜀人官至侍郎見
朱氏詞綜亦能書見南邨書史趙與恭見宗室世系表
可攷者凡得十一人諸人之中師點有聲嘗與周益公
奏秦檜誤國為相日訪搜人才置夾袋中使金不辱君
命傳稱著有易說史識文獻通考題正憲集七十卷彥

直以貴胄在鄂州有功上疏乞追貶誣陷岳家事者嘗
撫本朝事著水心鏡總一百六十七卷之二人者賢已
鄭丙阿附王淮以比唐仲友與朱子為難遂致顯黜道
學慶元學禁丙實倡之史不掩其美惡觀此題名而賢
奸判然可鑒也本紀於游幸諸園皆書此獨闕如史家
之漏又於是年兩書九月以甲子巡之當是九月為閏
玉津園地近園壇講燕射之所淳熙元年孝宗御製七
言詩皇太子及羣臣廣和右丞相曾懷有記刻石園中

今碑記訖無一存惟此數段摩崖在蒼雲翠篠中並得
拓出亦可想見南渡衣冠盛事云

淳熙丁未季春甲子駕幸玉津園蕭燧韓彥直
宇文价洪邁葛邲蔣繼周葉翦韓彥質王信陳
居仁李岷陳賈章森顏師魯劉國瑞胡晉臣扈

從至此

右刻在
龍華寺

宋孝宗淳熙十四年歲在丁未本紀書是年三月甲子
幸玉津園即此題名時也宰輔年表是時王淮周必大

為相十五年蕭燧除叅知政事十六年葛邲除同知樞
密院事明年光宗紹熙元年邲進叅知政事胡晉臣除
簽書樞密院事四年邲拜右丞相紹熙盡五年明年寧
宗慶元建元二年葉翦除簽書樞密院事自丁未迄丙
辰凡十年間登揆席者四人亦盛事也韓彥直彥質蘄
王之子洪邁忠宣公子皆能世其家王信陳居仁史稱
良吏顏師魯史稱法宋璟以上除翦與彥質外史並有
傳陳賈攻道學時林栗劾朱子太常博士葉適論粟襲

王淮鄭丙陳賈之說妄廢正人是賈固僉壬之流也章
森因議高宗配饗請用張浚岳飛雖不從其議是森亦
能持論者二人見本紀中宇文价僅見金使館伴事諸
公字與謚之可攷者燧字照鄰謚正肅彥直字子溫邁
字景盧謚文敏邨字楚輔謚文定信字誠之居仁字安
行師魯字幾聖謚定肅晉臣字子遠謚文靖籍之可攷
者燧為臨江軍彥直彥質為延安邁為鄱陽邨為吳興
信為麗水居仁為興化軍師魯為龍溪晉臣為蜀州官

位之可攷者自四執政外彥直工部尚書爵蘄春郡公
淳熙二年曾知臨安府三日邁端明殿學士彥質淳熙
十年除太府卿知臨安府十一年罷十三年除試兵部
侍郎復知臨安府十四年加工部尚書十五年除徽猷
閣直學士罷尹予宮觀信官浙東安撫使加煥章閣待
制居仁曾官華文閣直學士賈淳熙十四年官右諫議
大夫森淳熙十五年官吏部侍郎師魯官吏部尚書龍
圖閣直學士右十六人可攷者已十有三名之最著者

邁有野處類藁容齋五筆夷堅志傳稱邨有文集二百卷詞業五十卷然未之見也信有是齋集出守武昌撰武昌志居仁有奏議制稿亦未見惟咸淳志中得邨文數篇及賈御史臺題名記信中空華嚴閣記又於播芳大全得信謝宮祠表二篇文皆可觀此段書法道勁雖經剝蝕風規具在信傳稱其能書得米家法以此驗之斷為信筆無疑也

咸淳七年正月二十二日潛說友徐理同游龍

華

南宋京兆尹拈蒼潛說友字君高號夔野度宗咸淳四年閏正月以朝散郎直文華閣兩浙運副除司農少卿知臨安府事是年二月兼勅令所刪修官三月轉朝請郎十月除司農卿五年二月轉朝奉大夫四月兼權戶部侍郎四月轉朝散大夫五月兼權兩浙運使九月除權戶部侍郎十月兼同詳定勅令官六年正月轉朝請大夫八月除戶部侍郎次年二月兼權戶部尚書三月

轉朝議大夫六月轉中奉大夫八月除權戶部尚書兼
詳定勅令官十月罷府事說友以郎出守在任將及四
年進階者六兼職者六遷除者四封緡雲縣開國男食
邑三百戶是時賈似道當國說友實附麗之得以躡進
崇階然其作尹時撰咸淳臨安志一百卷搜羅畢備是
誠有功於吾杭者先是周淙曾撰淳祐臨安志至說友
擴充之後來徐一夔撰洪武杭州志約為五十卷今失
傳夏時正撰成化杭州志又廣為七十卷版樣猶仍潛

氏之舊至陳善撰萬厯杭州志時刊落殆盡微咸淳一
編吾鄉舊聞放失者多矣理為寶祐四年文天祥榜進
士蕭山人登科錄云字德玉小名江老小字亨道中第
三甲一百六十九名其官位未之詳也

至能季思壽翁虞鄉子宣正甫渭師子餘无咎

淳熙戊戌季春丁巳同游子師不至

右刻在
龍筆寺

孝宗淳熙五年歲在戊戌至能范石湖字宰輔年表是
年四月丙寅范成大自禮部尚書除中大夫叅知政事

六月乙亥罷石湖在政府凡七十日是日題丁巳距丙寅宣麻之日僅十日日本紀書三月丁巳幸玉津園此因扈從至也壽翁李椿字洺州永年人官至敷文閣直學士淳熙二年曾知臨安府不阿權幸遂罷去後朱子銘其墓楊誠齋作傳无咎韓元吉字又號南澗宰相維之元孫官至吏部尚書龍圖閣學士之二人宋史有傳虞卿沈揆字光宗紹熙中出知蘇州見石湖吳郡志又楊誠齋詩注云虞卿喜收碑刻自號欣遇正甫劉姓子餘

齊姓又見淳熙己亥題名石湖有同劉正甫戶部集西湖張園詩咸淳臨安志載淳熙六年權刑部侍郎齊慶胄撰刑部廳壁記慶胄當是子餘名渭師趙礪老字東平人曾從石湖使金繼李椿知臨安是年二月除工部尚書仍兼府事十一月罷是時渭師方為京尹石湖集有次韻平江韓子師侍郎見寄詩注云子師新作小築於浙江吳靈泉讀書臺呼月臺是其所居之處也題名總九人可考者八人已如右石湖之字至能史傳及今

詩集皆作致惟誠齋集宋本原作至而石湖集中有寄
兄至先詩驗之此刻可知作致者之誤矣

周子充程泰之劉正甫王仲衡芮國瑞陳敦仁

吳希深木韞之齊子餘以淳熙己亥季春廿有

二日同來

在龍
華寺

孝宗淳熙六年歲在己亥本紀書三月庚辰幸玉津園
是歲二月朔為己丑數至三月廿有二日為庚辰正合
駕幸之日諸公皆因扈從而至其題名於石壁也周必

大字子充程大昌字泰之王希呂字仲衡又字仲行木
待問字韞之齊慶胄字子餘可攷者如此蓋公是時官
禮部尚書兼翰林學士是歲十一月轉吏部尚書明年
五月除叅知政事攷益公年譜淳熙六年六月詔禮官
議明堂典禮公定圜丘合宮互舉之議合祭天地並侑
祖宗從祀百神如南郊禮初九日禮部太常寺同進狀
公獨具劄子十七日得旨依行劄并狀并見南宋相眼
而本紀中失記此事又年譜載本月二十四日有戒飭

諸路轉運使手詔公即有繳進草詔劄子論財計之方
上下通融之道二十四當是壬午本紀載此事誤為丁
丑則是十九日矣兩事皆作此月中而一關典禮一係
國用並朝事之大者故拈出之益公久典制誥稱大手
筆其平園集裒廣至二百卷南宋作家無出其右者即
此殘巖舊跡令人猶想見玉堂羣公雍容盛事况程泰
之名在儒林王仲衡亦著直聲此刻之傳當有神物護
持者矣

淳熙十年三月十八日車駕幸玉津園蕭燧王
佐黃洽曾建宇文价葛邲王藺張大成詹儀之
余端禮李昌圖趙彥中以扈從至此

孝宗本紀淳熙十年三月癸未幸玉津園即此題名之
日宋制凡幸諸園侍臣五品以上皆從獨此刻執政者
五人皆南宋名臣宜乎字蹟嚴秘久而弗磨也蕭燧字
照隣臨江軍人淳熙十五年叅知政事謚正肅黃洽字
德潤福州侯宮人淳熙十年叅知政事葛邲字楚輔吳

興人光宗紹熙元年叅知政事四年拜特進右丞相加
少保贈少師謚文定從祀光宗廟庭王蘭字謙仲廬江
人淳熙十六年叅知政事謚獻肅余端禮字處恭龍游人
紹熙五年叅知政事寧宗慶元二年拜特進左丞相加
少保郇國公謚忠肅史稱燧與洽為良執政邨有惠愛
蘭能剛直端禮當韓侂胄用事志弗行而去位其外如
張大經字彥文建昌人官禮部尚書謚簡肅史稱其足
當大任並有傳可攷也王佐紹興十八年進士及第淳熙

七年以工部尚書知臨安府十年六月除戶部尚書罷
府事詹儀之字體仁見朱文公書劄淳熙八年官起居
舍人撰吏部郎官題名碑記李昌圖淳熙十年官工部
侍郎是歲四月撰工部長貳廳題名碑記攷記中稱王
佐為長卿則此題名時佐為工部尚書兼京尹昌圖為
工部侍郎並從咸淳臨安志攷得者曾逮字仲躬章貢
人官戶部侍郎文清公幾之子見文獻通考宇文价見
施師點傳趙彥中潁川郡王裔見宗室世系表雖不能

盡知其字號與所終官位然此刻十有二人大槩悉得之史傳載邨有文集二百卷詞業五十卷洽有文集奏議八十五卷文獻通考載逮有習菴集十二卷蘭有軒山集十卷而儀之昌圖並有文見臨安志長留天地間斯石應不朽矣

心印銘 唐翰林學士兼太子侍讀史館修撰

守右補闕梁肅作 浩浩羣生或動或靜或幽

或明旁魄六合運用五行莫不因其心而寓其

形波流火馳出入如機如環無端莫知其歸或
細不可視或大不可圍日月至明或以為昏秋
毫至微或以為繁或囊括天地或渴飲四海舒
卷變化惟心所在天壽得喪惟心所宰心遷境
遷心廣境廣物無定心心無定像明則有天人
幽則有鬼神苦樂相紛如絲之棼有無云云不
可勝言抑末也已本則不然惟本之為體寂兮
浩兮不可道兮顯矣默矣不可測矣統萬有於

纖芥視億載於屈指外而不入內而不出不闔
不闢不虛不實無感不應無應不神在天而天
在人而人常存而未始或存常昏而未嘗或昏
豈惟我然蓋無物不然豈惟我得蓋無物不得
混而為一莫睹其極故曰心生法生心滅法滅
離一切相則名諸佛 錢塘講律僧冲羽書
陶翼并男拱鐫字 大宋皇祐癸巳歲七月草
堂僧慎微糾同志刻於石龍院之崖 建中靖

國元年仲冬會稽錢倩仲游

右刻在舊石龍院

度慈雲之陰巉巖互伏榛莽沒行跡又有巨石當路口穿隙始得上兩崖對劈其崖上隆下窳日月風雨所不至刻面平如鏡微裂一痕無苔蘚之侵蝕至今字畫如新北宋摩崖鮮見完美若斯者已梁肅名見唐書蘇源明傳後字曰敬之又曰寬中隋尚書毗之後世居陸渾德宗建中朝中文辭清麗科授校書郎以蕭復薦拜右拾遺杜佑辟為淮南書記入為左補闕翰林學士皇太

子侍讀卒年四十一此所題之官與傳合是銘載唐文粹中銘前有陳諫序云安定梁肅學止觀法門於沙門元浩其未知也患不能知之既知之患不能至之於是作心印銘蓋几杖盤盂座右之類取其自省也其文自浩浩羣生至有無云云言未知也自本則不然至終篇言其既知也以既知之心印其未知號曰心印銘太極與經論合而歸於無相庶乎哉諫獲與敬之游又嘗聞浩公之言故序其所由然著於銘之首按此序原繫於

銘因全錄之文粹凡錄肅文二十三篇為釋氏作者居多然如受命賦西伯受命稱王議磻溪銘四皓贊圮橋碑釣臺碑鹽池兵歲諸篇要皆有闕經濟崔茶撰肅集序凡八百餘言極稱其文章粹美此即通考所載梁補闕集二十卷者是也肅又為李泌獨孤及李翰作序且與陸宣公游惜乎其集失傳今即文粹中觀之固衰然一大作者全唐詩僅存梁補闕一首并失其名非選錄家古今文人之幸傳者希矣冲羽書法絕似顏魯公即

刊石之慎微舉不可攷當於偈剝譜牒中徐求之未一行錢倩仲題名又瑤華洞亦有倩仲刻字自稱彭城乃武肅王裔也

尚書省牒

大字

月輪山六和塢開化寺住持講唯

識因明等論僧智曇狀切念開化寺舊有六和

塢一座永鎮江潮後方賊燒毀片瓦不存遂致

江濤泛漲居民不安舟楫失利紹興二十二年

十一月內臣僚上言三省同奉聖旨塔廟令禮

部看詳興工令臨安府轉運司同共措置後於
二十六年智曇蒙臨安府給帖住持修建且智
曇不願申請官中錢物材料木植盡是自己衣
鉢并教化檀越樂施錢物今來已建七層院宇
百間將欲成就委是江潮平靜舟楫無虞切緣
開化寺原有勅黃文字昔緣兵火燒燬不存欲
望持賜給降勅黃付智曇住持伏候指揮小字
牒奉勅宜賜開化寺為額牒至准勅故牒大字

少保尚書左僕射同中書門下平章事 簽書

樞密院事兼權叅知政事錢押 同簽書樞密

院事兼權叅知政事虞押 隆興二年十二月

日牒尚書省印 又付僧智曇劄臨安府印 押文並不錄 又

付開化寺劄乾道元年七月日臨安府印 押 又臨

安府軍府帖乾道元年八月日右刻在六和塔

宋制尚書省牒皆橫軸牒用大字行書本事用小字真書銜徑一條大字粗細文此碑橫分四段皆依省式惟

加題額中間二三兩題其文先左後右隆興二年之明年為乾道改元也宰相輔表云中書平章為宰相樞密使權任惟均謂之兩府皆謂之執政如此則中書門下平章事為宰相應先於兩樞密矣按錢為端禮虞為允文年表隆興二年十一月辛丑端禮除端明殿學士簽書樞密院事明年壬寅允文除端明殿學士同簽書樞密院事十二月辛卯端禮除叅知政事同日允文除同知樞密院事至明年乾道元年三月庚申允文始除叅知

政事據此則隆興牒上允文不得書叅知政事或因乾道後牒而僧家之刻有誤歟其左一行有官闕姓考本紀隆興二年十一月戊戌以陳康伯為尚書僕射同中書門下平章事本傳康伯復相即其家除拜與疾就道至闕以疾免朝謁是因康伯不至中書故其下有免押字也首輔不書姓特例也咸淳臨安志稱賜額慈恩開化教寺慈恩字省中略去又云開寶三年吳越王就南果園建寺造六和塔以鎮江潮方臘燬紹興二十二年

北僧智曇重造十年始成今牒稱紹興二十六年始工
至隆興二年凡九年塔廟皆成於是住僧等論智曇功
狀故有是牒而明年住僧復請蠲免又有後劄并府帖
時臨安尹為薛良朋其文剷去最始建塔之名是誤書
智曇而去之者余從曹勛松隱集搜得六和塔記稱吳
越時智覺禪師延壽同僧統贊寧創建今攷闕名必居
其一靈隱舊志延壽字冲玄賜號智覺後遷永明道場
撰宗鏡錄侍者贊寧錢王署為兩浙僧統歸朝後賜號

通慧撰高僧傳內典外學等集余從數百年得補其闕
而此寺自吳越名壽寧院塔又名六合皆足備異聞也

六藝之一錄續編卷五